

1 BETESALONIKA

É Kálara Ósúa Betesalonika

Mebéránn

1 ¹Pablo bíabe Silvano ya Timoteo á mfá ékóánn bebwíni é ne á Tesalonika ébe Nzamá Éséá ya fe ébe Ntí Yesukristo; mvɔmm ya mvwaá ébe mína.

Ávé Nzamá akíba

²Bía vé Nzamá akíba eyɔɔ ése á mfá mína bésesé, bíí síman mína á méyaglán mea été kaa ádzɔɔ. ³Bía síman mína ósú Nzamá ya Éséá wea, ébe éséññ ye á mbwínánn wenan, ya fe éséññ ye édzɔɔ, ya édí ye etéññ mbán ébe óyan wenan ébe Ntí wea Yesukristo. ⁴Á míndzindziɔɔ mí bɔbédzaɔ ébe Nzamá, bíí yem ntɔpbán wenan, ⁵akála ná é mbamba fwéñ wea eé ndzí sian ébe mína fáve ya bifíá etámm; ve ná ya nguu, ya Mfúfúp Nsísim, ya fe abwiññ mebúnn, amvála ané mína yem nzá ámvála bot bí mbé énzénzaɔ denan, ya ákála denan.

⁶Ané mína míní nzu yaá fe bɔ bévú bea ya ébá Ntí, mína ñɔɔ efíá ábwiññ midzuúk été ya mesán méye á Mfúfúp Nsísim, ⁷akekwíñ ná, míní nzu yaá bɔ efonann á mfá bebwíni bése béye a Masedonia ya Akaya. ⁸Amú ná atée ye ébe mína, efíá Ntí e katban yaá, se fáve á Masedonia ye Akaya etámm, ve ná ya fe mévóm mése mbwínánn wenan ébe Nzamá ó mana yaá myaman, akekwiñ ná bíá yi fe dzam enziɔ ye áfáɔ bera ákóɔ. ⁹Amú ná bébyen bá kat nzá ámvála míní ngá ñɔɔ bíá ébe mína, ya fe nzá ámvála míní ngá lúm biyemá mvús á mfá ábúlán ébe Nzamá, ná mína séan ya é Nzamá a ne ntétéá ya bebélá, ¹⁰míní yana fe é Mwán weñ Yesus, éñí aa ye sɔ á dzóp été; éñe Nzamá a ngá wómo míwúán été, éñe fe aa koro bíá ébe méyéá má nzu.

Éséññ Nzamá Pablo a ngá bɔ á Tesalonika

2 ¹Á bɔbédzaɔ, amú ná mína bébyen mína yem ná mfépbán wea ébe mína weé ndzí bɔ kaa eban, ²fáve ná, niané bí ngá yén midzuúk ya

bindáglé á Filipos amvála ané mína yem, ébe é Nzamá wea éñe bí mbé bí tɔɔ ya ñí mebúnn á mfá ákat mína é mbamba fwéñ Nzamá ébe abwiññ bindáglé été. ³Amú ná, melépgá mea mǎá sɔ́ évuzá été, ngé á mvin, ngé ki á meduk. ⁴Fáve ámvála bí tɔɔ yaá nkyabán ébe Nzamá, ná átéle bía á mfá mbamba fwéñ amvála te édo bía kɔ́ɔ, se ná bot ébɔ́ bé sák bía, fáve Nzamá, éñí aa fas mílém myea. ⁵Amú ná amvála ané mína yem, bí ndzí sɔ́ ya mína tám enziŋ ya bembamba bifíá méduk, ngé ki ya oyéá byém ye áswéññ; Nzamá a ne ngañiá. ⁶Kaa ki dzéŋ é dúmá dá sɔ́ ébe bot, ngé éedenan, ngé ki édí bot befé. É tɔɔ ná, bí ne é baapostol Kristo, bí mbé mína vé mbaga; ⁷ve bía bí ngá lére añep énzénzan denan, amvála ané ñiá aa yem baale é bwán beñ émyen. ⁸Néa éñe bí belé ya mína ededea edziŋ, bía tɔɔ ya mesán ná bí kee mína, se fáve é mbamba fwéñ Nzamá, ve ya fe bínin bía bébyen, ya dzam te édo míní ngá bíra ɔ́ é bot bía dziŋ.

⁹Amú ná, á bɔ́bédzan, mína síman ané bí ngá dzuk ya biséññ bí nguu alú ya ó mos, á mfá ye ná bí táa ɔ́ mot enziŋ ye ébe mína mbaga, bí kat mína é mbamba fwéñ Nzamá.

¹⁰Éde, mína míní ne bengañiá, ya Nzamá, ébe nzá ámvála bembamba bé bot ya benzósoó, ya fe kaa bidzo bí mbé énzénzan denan, mína bebwíni. ¹¹Ané mína yem, nzá amvála bí ngá lép mína, amvála ané éséá a ne do ɔ́ ya kada é mwán mbɔ́ɔ weñ; ¹²bí ngá vé mína nguu ya melépgá, bí vé mína ngañiá á mfá ye ná míní nin ané dá ñep ya é Nzamá a lwée yaá mína édzwée ngómán deñ ye é dúmá deñ.

¹³Dzam te édo fe, bía kaa ki ádzɔ́ɔ ná bía vé Nzamá akíba, akála ná niané míní ngá ñɔ́ŋ éfíá é mbamba fwéñ Nzamá édí míní ngá wók ébe bía, éde míní ngá yébe do; se amvála ané medzó mé bot, fáve amvála ané éfíá Nzamá ébyen é ne bébélá, édí ébyen dá ɔ́ fe eséññ ébe mína bebwíni. ¹⁴Amú ná, á bɔ́bédzan, míní sɔ́ yaá vú efonann ye bíkóánn bebwíni Nzamá bí ne á Judea ébe Kristo Yesus, míní yén fe midzuúk é mó bot béye é sí denan, ntéññ mbɔ́ɔ fe ané ébɔ́ é mó bejudio. ¹⁵Ébɔ́ fe bé ngá ywíñ Ntí Yesus ya bekúlu medzó, bé bíra fe bía dzéŋ así, báá ɔ́ édí Nzamá aa yén mvéáñ, fáve bé téle bot bése á ngamm áyát. ¹⁶Éde, béé kili bía nkɔ́ɔ ébe meyɔ́ŋ mefé, á mfá ye ná me tɔɔ nkoránn; asúgánn é ne fáve ná, tám áse bá dzálá é nɔ́mɔ́ mísémm weba. Ve méyéá Nzamá má mé súgan yaá fe sian ébe bó.

Pablo a ngá kómo fép Betesalonisense

¹⁷Ve, á bɔ́bédzan, bíabe mína bí tɔɔ nkánán á mison été oyomm tám, ve se á nlém. Bí mbé bí tɔɔ evévéñ ye ábira ákómo áyén mészú menan.

¹⁸Ya dzam te édo bí ngá vak ná bía nzu ébe mína; ma Pablo, álot eyɔ́ŋ evɔ́ɔ; ve Sátan ñí á dzip bía do. ¹⁹Amú ná, dzé é ne oyan wea, ngé ki mesán, ngé ki dás ye áwún ye engúŋ? Nde se mína míní ne do ósú Ntí

wea Yesus, é tám aa ye sian? ²⁰Amú ná mína míní ne é dúmá dea ya mésán mea.

Bá lóm Timoteo

3 ¹Éde ákoan ná bí sés fe dɔ nzomo, éde bí ngá yén mvéáñ ná bí lígi etámm Átenas. ²Ané bí ngá lóm mwadzɔɔ wea Timoteo, bíabe bó bía bɔ fe éséññ Nzamá fufúlu ébe é mbamba fwéñ Kristo, á mfá áyéme mína ya álép mína ébe mbwínánn wenan; ³ná mot enziɔ a nza fógan ákála bindáglé bíte, amú ná mína bébyen mína yem ná ya dzam te édo bí ne ntélán. ⁴Amú ná, é tám bí mbé bíabe mína, bía tára mína dzó ná bí nkún yén bindáglé, néa fe dá é ngá bɔ, amvála ané mína yem. ⁵Ákála dzam te, ákoan ná ma mée mbé fe nzomo, éde me ngá lóm Timoteo ná me yem ébe édí ye á mbwínánn wenan, a nza bɔ amvála enziɔ ná mbóble bot á bóble yaá mína; éde éséññ dea dá é sùgan nzu bɔ kaa eban.

⁶Ve éndagá, Timoteo a búlán yaá ébe bía, eé sɔ ébe mína; ñí á sɔ fe ya bía bembamba mefwéñ méye á mbwínánn wenan ya édziɔɔ denan, ya fe ná, tám áse míní belé bía mbamba osímánn, míní bíra bía kómo yén, ntéññ mbɔɔ fe ané bía bía kómo fe mína yén.

⁷Édo, á bɔbédzɔɔ, ébe é dzóm ése bía yi, ya fe bindáglé byea, bía tɔbɔ ya mfoɔɔann mílém á mfá wenan ébe mbwínánn wenan. ⁸Amú ná, éndagá éñe bí ŋga niɔ yaá, ngé mína míní yém nguú ébe Ntí. ⁹Nzá akíba fá bí ne búlán vé Nzamá á mfá wenan, ya mésán mése bí ngá sán ya mɔ ébe á sú é Nzamá wea ákála denan; ¹⁰éde bí ngá bíra yaglan alú ya ó mos, ná bí ne yén mészú menan, ya fe ná bí sɔɔan édí dá dzéɔ á mbwínánn wenan?

Méyaglán Pablo ya éma é bot bábe bó bá bɔ éséññ fufúlu

¹¹Édo ná, Nzamá émyen, ya Éséá wea, ya fe Ntí wea Yesus, éñe á léregé é nzenn dea ébe mína. ¹²Ve Ntí á bɔɔge ná míní vém ya á tɔbɔ fe ndzálánn ya edziɔɔ ébe bevɔɔ ya ébá bevɔɔ, ya fe á mfá bot bése amvála ané bía bía bɔ fe dɔ ébe mína; ¹³á mfá ye ná, á yém mílém myenan kaa meku á ntɔpbán eki ébe á sú Tará, ya é Nzamá wea, ébe á sú Ntí wea Yesus bábe mítɔpbán mí bot myéñ.

Bía yian niɔ ámvála dá vé Nzamá nlém mesán

4 ¹Éde, á bɔbédzɔɔ, bía sùgan mína dzaa ya álép mína ébe Ntí Yesus ná, ané míní ñɔɔ yaá ayágalé ébe bía, á mfá ámvála mína yian niɔ ya ávé Nzamá nlém mesán, néa fe mína míní ŋga niɔ yaá, amvála te éñe míní bíra dɔ bɔ.

²Amú ná mína yem nzá metsiɔɔ bí ngá vé mína ébe Ntí Yesus. ³Amú ná nkómánn Nzamá éwɔ wi; ntélán eki wenan; é ne ná, míní tɔbɔ nkánán ya nsémm eveák; ⁴kada mot ye ébe mína, á yemɔe kálá é ñúu deñ á ntɔbán eki éte ya ngaɔɔ, ⁵se áwulu tugá amvála ané meyɔɔ mefé mé ne

kaa áyem Nzamá. ⁶Mot enziñ a táa duan, ngé ki ávus ya mwanñan ébe dzam te; dá é tɔɔ ná, ébe é mam má mése, Ntí éñe aa kun, amvála te fe bía tára mína dɔ dzó ya ávé mbámm. ⁷Amú ná Nzamá eé ndzí bía lwée á mfá mvin mam, fáve á ntélán eki. ⁸Édo é ne ná, éñí áse aa tep métsiñj má, áá tep mot binam, fáve é Nzamá aa vé mína Mfúfúp Nsísim weñ.

⁹Ve á mfá edziñj bɔbɛñafwáa, mínáa yi ná me tsili mína dɔ. Amú ná Nzamá éñe a yágale yaá mína bébyen ná, dziñján bevɔɔ ya ébá bevɔɔ. ¹⁰Amú ná éñe fe mína bɔ dɔ néa ya é bɔbédzanj bése bé ne á Masedonia áse. Ve, á bɔbédzanj, bía lép mína ná néa míní bira dɔ danj bɔ. ¹¹Éde, bíragán dzéñ ná míní niñ mvwaá, míní bɔ fe é mam menan mína bébyen, ya fe ábo eséññ ya é mó menan, amvála ané bí ngá mánan mína; ¹²á mfá ye ná míní niñ ya nganñj ébe bot béye átán, míní bɔ fe kaa áyi dzóm enziñ.

Ásɔɔ Ntí

¹³Á bɔbédzanj, bíá kómo ki ná míní tɔbɔ kaa áyem á mfá ye ébá bé ntɔɔ óyó [nwúán], ná míní nza tɔbɔ eywiññ amvála ané é bot bevɔɔ bé ne kaa átɔbɔ ya oyan. ¹⁴Amú ná ngé bía bwíni ná Yesus aá wú, a wómo fe; amvála te fe ébá bé ngá ke óyó [áwú] ébe Yesus, Nzamá aa ye sɔ ya ñí bábe bó.

¹⁵Dzam te édo, bía dzó mína ébe éfiá Ntí ná: bía é bot bí ngén betétéá, bía é bot bía lígi akekwiñ ásɔɔ Ntí, bíá ye tébe é bot bé ntɔɔ óyó [nwúán] ósú amvála enziñ. ¹⁶Ve deá, Ntí émyen aa ye sigi eé sɔ á dzóp, ya kíñj édzwée ya é kíñj ntébosú baáñgel, ya fe é kíñj tɔñ Nzamá, éde ébá bé wú yaá ébe Kristo ébɔ bá ye tára wómo. ¹⁷Véa, bía é bot bí ne betétéá, bía ye dzíga bétban nsámá mbɔɔ bíabe bó á mikút á mfá áke koan ya Ntí á nyem dzóp, amvála te édo bía ye tɔbɔ bíabe Ntí kɔmm áse. ¹⁸Édo é ne ná, fonñán milém ya bífiá bí, bevɔɔ ya ébá bevɔɔ.

5 ¹Ve, á bɔbédzanj, á mfá metám ya biyɔñ, mínáa yi ná bé tsili mína dzam enziñ. ²Amú ná mína bébyen mína yem mvéañ ná é mos Ntí wá ye sian amvála ané ndzídzip á alú. ³Akála é tám bé nga dzó yaá ná, bí ntɔɔ mvwaá, mam má mé ntɔɔ fe nkomann, véa éñe, ntsamann mam wá wá ye sian atemtém, ané mítéñ mí mye myá sian é miningá a ne abum; éde báa ye sáale amvála enziñ. ⁴Ve, á bɔbédzanj, mína míní sés ó dzíbi ósí, ná mos te ó dzili mína ané ndzídzip. ⁵Amú ná mína bésese míní ne bwán béye eyéa ye bwán béye ó mos. Bí sés ébá béye á alú, ngé ki ébá béye ó dzíbi ósí. ⁶Édo é ne ná, bí táa ke óyó amvála ané ébá bevɔɔ; fáve ná, bí mómɔñán, bí tɔbɔgán ya kén. ⁷Amú ná ébá bá ke óyó, bá ke óyó á alú; ébá bá bá fían, bá bá fían fe á alú. ⁸Ve dá é tɔɔ ná bí ne ébá béye ó mos, bí tɔbɔgán ya kén, bí tɔbɔgán mbwátán eben ye á mbwínánn ya édí ye edziñj, ya afogolónj ye oyan, éñí ye ákoroga. ⁹Amú ná Nzamá eé ndzí bía téle á mfá meyéa, fáve á mfá akoroga ébe Ntí wea Yesukristo, ¹⁰Éñe a

ngá wú ákála dea, á mfá ye ná ané bí téa, ngé ki óyó, bí niŋ fufúlu bíabe bó. ¹¹Édo ná, foŋŋán milém bevóó ya ébá bevóó, ávéán fe nguu mbóó ébe éní mbóó, amvála ané míní nga bó yaá dó.

Mélépgá má súgan

¹²Ve, á bobédzaŋ, bía dzaa mína ná míní yem ébá bá bó eséññ énzénzaŋ denan; ébó bé ne mína betébosú ósú Ntí, ébó fe bá lép mína. ¹³Váán bó ededea ngaŋŋ édziŋŋ été, akála éséññ deba. Tóbogán mvwaá bevóó ya ébá bevóó.

¹⁴Á bobédzaŋ, bía lép fe mína ná, ébá bé ne andeát, váán bó mbámm; ébá bé ne mitéteák, váán bó nguu; vwálagán ébá mílém mí teak yaá, belégán edzíp ya bot bése.

¹⁵Dággán ná mot enziŋ a táa búlu éní mbóó abé ya abé; fáve ná dzéŋŋán eyŋŋ ése édí é ne mvéáñ bevóó ya ébá bevóó ya á mfá bot bése.

¹⁶Tóbogán ya mesán tám áse. ¹⁷Yaglánán kaa ádzogó. ¹⁸Váán akíba ébe dzaŋ áse, amú ná édo é ne nkómánn Nzamá á mfá wenan ébe Kristo Yesus. ¹⁹Míní táa dzím Nsísim; ²⁰kaa ábyanán nkúlánn medzó. ²¹Ve fasgán ásesé, biñŋán édí é ne mvéáñ; ²²dzogán amvála abé áse.

²³Ve Nzamá ye á mvwaá émyen, á tóógé mína bésesé ya eki ése; ya fe ná wámyen ngúra, nsísim, nlém ya ñúu á tóbogé nkálánn kaa bidzo akekwiñ ásóó Ntí wea Yesukristo. ²⁴Éñe aa lwée mína a ne éní bá tóbó ya ñí mebúnn, éñe fe aa ye dó bó.

Meyáán

²⁵Á bobédzaŋ, yaglánán ákála dea.

²⁶Ábérán ya bobédzaŋ bése ya ñáŋán memáŋŋ bobéñafwáa.

²⁷Ma manan mína ébe Ntí ná bé lán é kálara ñí ébe bobédzaŋ bése.

²⁸É mvomm Ntí wea Yesukristo eé tóbogé ya mína.